

---

Saknr: 2020/36192-1  
Saksbehandlar: Åge Avedal

---

## Saksgang

Utval	Utv.saknr.	Møtedato
Hovudutval for kultur, idrett og integrering		13.02.2020

## Tilskot til drift av regionale barne- og ungdomsorganisasjonar

Forslag til vedtak

1. Hovudutval for kultur, idrett og integrering vedtek retningslinjer for tilskot til drift av regionale barne- og ungdomsorganisasjonar.
2. Tilskot til drift av regionale barne- og ungdomsorganisasjonar blir lyst ut med søknadsfrist våren 2020. Hovudutval for kultur, idrett og integrering gjer endeleg vedtak om fordeling av tilskot etter søknadsfrist.
3. Det vert sett av kr 1.700.000 frå posten «Tilskot til barne- og ungdomsføremål» til ordninga.

## Samandrag

Hordaland og Sogn og Fjordane fylkeskommunar har tidlegare støtta dei frivillige regionale barne- og ungdomsorganisasjonane gjennom midlar frå fylkeskommunen. I budsjettvedtaket i fylkestinget vart det sett av 2,152 millionar kroner til *ymse barne- og ungdomsføremål*, der midlane skal gå til barne- og ungdomsfeltet generelt og organisasjonslivet spesielt. Fylkesdirektør vil lyse ut ei tilskotsordning til dei regionale barne- og ungdomsorganisasjonane, og kjem i denne saka med forslag til retningslinjer for denne.

Per Morten Ekerhovd  
fylkesdirektør

Ronny Skaar  
seksjonssjef

*Saksframlegget er godkjent elektronisk og har difor ingen handskriven underskrift*

Vedlegg

Retningslinjer for tilskot til drift av regionale barne- og ungdomsorganisasjonar

## Saksutgreiing

### Bakgrunn for saka

Vestland fylkeskommune vil fremje eit sterkt, mangfaldig frivillig og profesjonelt kulturliv. Regional plan for kultur i Sogn og Fjordane 2019-2027, *Kultur for alle*, og regional plan for kultur i Hordaland 2015-2025, *PREMISS: KULTUR*, er styrande for kulturpolitikken i Vestland. Eit viktig verkemiddel for å nå måla i dei regionale planane er tilskotsmidlar til kulturfeltet i fylket.

Fylkestinget har sett av midlar i budsjettet for 2020 til barne- og ungdomsorganisasjonar gjennom posten «Tilskot barne- og ungdomsføremål» med 2 152 000 kroner. Fylkesdirektør vil fremma forslag om at det vert sett av kr 1.7 millionar frå posten til denne tilskotsordninga. Fylkesdirektør vil koma attende til fordelinga av dei resterande midlane i eiga sak.

Sogn og Fjordane fylkeskommune har dei seinare åra lyst ut kulturmidlar som éi ordning, der ein har hatt høve til å søkje om to typar tilskot, til drift eller til prosjekt og tiltak. Både frivillige organisasjonar, profesjonelle kunst- og kulturinstitusjonar og kunstnarar i det frie feltet har hatt høve til å søkje om støtte frå kulturmidlane. Frivillige barne- og ungdomsorganisasjonane har fått tilskotsmidlar gjennom kulturmidlar og tilskot til drift.

Hordaland fylkeskommune har dei seinare åra lyst ut ei eiga tilskotsordning til drift av barne- og ungdomsorganisasjonar. Fylkesdirektøren foreslår ei vidareføring av denne ordninga, med enkelte endringar i retningslinjene.

I Hordaland fylkeskommune har tilskot til regionale barne- og ungdomsorganisasjonar vore tildelt utifrå ei kvantitativ utrekning som gjeld aktivitet og tal medlemmer i kommunane, samt teljande medlemmer under 26 år i organisasjonane. Vidare har faktorar knytt til kjønnsrepresentasjon, ungdomsrepresentasjon i styret i fylkesleddet, samt om organisasjonen har meir enn halvparten av medlemene i aldersgruppa under 26 år gitt utslag.

Fylkesdirektøren tilrår å endre retningslinjene slik at søknadene også blir vurdert kvalitativt knytt mot føremålet i tilskotsordninga. På denne måten vil ein gjennom tilskotsordninga kunne gje ekstra stimulans til organisasjonane sitt arbeid med å fremje demokratiske rettar og representasjon. Vidare vil ein kunne gje støtte utifrå aktivitetsnivå, opplæringsarbeid, utviklingsarbeid, samarbeidstiltak, om organisasjonen har tilsette og i kva grad organisasjonen arbeider for å oppfylle mål og satsingar i dei regionale kulturplanane.

Fylkesdirektøren meiner det er viktig at det ved tildeling av tilskot blir tatt omsyn til at ein har hatt ulike støtteordningar i dei to tidlegare fylkeskommunane, slik at organisasjonar ikkje risikerer stort inntektstap i 2020.

Fylkesdirektøren tilrår ein gjennomgang av kva organisasjonar som skal høyre under tilskotsordninga slik at den på best mogleg vis fyller føremålet om å legge til rette for aktivitetar for barn og unge under 26 år. Fylkesdirektøren vil ta omsyn til at ein har hatt ulike tilskotsordningar i dei to tidlegare fylkeskommunane. Samtidig blir det no utarbeidd nye tilskotsordningar til drift av kulturorganisasjonar og til drift av organisasjonar som arbeider spesielt for å fremje mangfald og inkludering. På bakgrunn av dette vil fylkesdirektøren sjå nærmare på kva tilskotsordningar organisasjonane bør høyre til.

Fylkesdirektøren meiner tilskotsordninga til drift av regionale barne- og ungdomsorganisasjone må evaluerast når første søknadsåret er omme. Vi vil bruke 2020 til å hauste erfaringar, og vil eventuelt justere tilskotsordningane frå 2021.

### Vedtakskompetanse

Hovudutval for kultur, idrett og integrering, jf. vedteke reglement for hovudutval for kultur, idrett og integrering, punkt 3.

## Vurderingar og verknader

**Økonomi:** Tildelinga er i samsvar med budsjett. Tilskotsordningar på kulturfeltet er eit økonomisk verkemiddel og står sentralt i den regionale kulturpolitikken til Vestland fylkeskommune.

**Klima:** Ikkje relevant.

**Folkehelse:** Dei regionale barne- og ungdomsorganisasjonane driv viktig folkehelsearbeid.

**Regional planstrategi:** Regional plan for kultur i Sogn og Fjordane 2019-2027, *Kultur for alle*, og regional plan for kultur i Hordaland 2015-2025, *PREMISS: KULTUR* set mål for tilskot til kunst- og kulturføremål.

## Konklusjon

Fylkesdirektør tilrår at det blir etablert og lyst tilskotsordning for drift av regionale barne- og ungdomsorganisasjonar. Det vert sett av kr 1.7 millionar til ordninga i 2020. Ordninga byggjer vidare på Hordaland fylkeskommune si tilskotsordning, men søknadene vil i større grad bli vurdert kvalitativt opp mot føremålet til ordninga. Fylkesdirektøren vil ved tildelinga av midlar vere spesielt merksam på at organisasjonar ikkje skal tape store inntekter samanlikna med tidlegare tildelingar. Fylkesdirektør tilrår ein gjennomgang av kva organisasjonar som skal høyre under tilskotsordninga, og kva organisasjonar som meir naturleg vil høyre under andre tilskotsordningar.